

楓山章先生集

七



編主五雲王  
編初成集書叢  
集生先章山楓  
冊七

中華民國二十四年十二月初版

撰者 章懋

發行人 王雲五  
上海河南路

印刷所 商務印書館  
上海河南路

發行所 商務印書館  
上海及各埠

徐

(本書校對者 林東塘 宗大樸)

楓山章先生集卷之九

詩

七言絕句一百七首

春雪三日

茅拔三陽泰運開。滿天和氣襲人來。如何尚有頑陰在。可是東君未放回。

雨後觀漲

天瓢夜倒雨如麻。曉望川原不見涯。且莫臨流羨河伯。試將秋水問南華。

院庭新樣小戰車。偶觀有作

二首·已上  
內苑作。

廟堂決策靜邊塵。巧作戎車樣製新。莫道只知俎豆事。胸中兵甲是何人。  
漢殿匈奴出武剛。晉平羌虜用偏廂。車攻原是先王制定。許收功殪犬羊。

送同年鍾美宣乃叔還鄉二首。

紫陌春回雪昨消。御溝流水碧迢迢。行人欲贈新楊柳。催喚東風長綠條。征車欲發重徘徊。落日離亭酒一盃。惆悵阿咸歸不得。夢魂隨上越王臺。

漳沱晚渡

二首。送同年張廷芳使陝西。

風捲流澌作晚波。行人猶說漢漳沱。那知天上乘槎客。不用冰堅也渡河。半川斜日照寒流。騎馬來經古渡頭。欲問蕭王冰合處。野烟衰草遍汀洲。

雲舍寧親

二首。送同年張叔亨歸廣東。

五嶺南頭瘴海圍。白雲飛處是親闈。何人得似張天子。四牡歸來戲綵衣。榕葉梅花嶺路長。皇華持節晝還鄉。此行不似并州使。悵望孤雲隔太行。

題介軒詩卷

二首。為同年賀克恭作。

半點緇塵不肯容。古來卓行許追踪。東風門巷多桃李。雪後徂徠一樹松。平生高誼薄秋空。柔古那能與世同。柳下英風寥落久。誰將一羽視三公。

送容一之歸廣東

二首。一之名貫。白沙陳先生高弟。

洙泗門庭海樣寬。望洋休道問津難。直從伊洛源頭去。鼓棹中流任往還。點瑟顏瓢萬古心。箇中真境要追尋。紫陽去後行人少。門巷蕭條草色深。

送同年謝元吉致政歸耒陽 二首。

醒卻邯鄲炊黍夢。便尋湘水釣魚船。時人莫訝休官早。還落文山後一年。曾因立仗難緘口。苦爲求芻又乞身。貧病獨憐歸未得。送君重憶故鄉尊。

題舒溪漁隱詩卷

爲同年李廷章作。

名利關頭曾打透。一竿終老白蘋洲。明時愧我渾無用。欲與先生假釣舟。

挽杜黃門喬妻

夢斷瑤池繡閣閑。翠幃香冷燭花殘。空遺舊織迴文錦。留與黃門灑淚看。

挽大理陶司務二首

紅蓮綠水舊知名。廷尉賓僚最老成。何事玉樓仙去早。棘林風雨易傷情。一官未徙鬢絲絲。誰遣藏舟壑遽移。腸斷容臺舊知己。西風揮淚寫銘詩。

壽李知府嗣母六首

黃鵠孤飛四十年。幾番機斷曉牕前。鄰姬只羨生兒好。恩誥時時下九天。誰教婺守得龔黃。寶婺當年降北堂。天爲蒼生如有意。壽星夜伴婺星光。一陽微露嶺頭梅。此日高堂初度來。王事賢勞歸未得。夢魂飛遶越王臺。南越東陽萬里身。幾年不見倚門人。潘郎會有閒居賦。花下安輿處處春。莫道無人戲綵衣。庭前賸有紫荊枝。未須便上陳情表。正是君恩欲報時。

太行山頂自看雲。何似遺羹錫類人。爲報金華賢太守。里閭無限白頭親。

挽林亨大瀚父母

四首。其父先爲上高知縣。歷寧海知州。陞撫州太守。

謝郡歸來理釣絲。不堪中夜壑舟移。舊游幾樹甘棠在。常作遺黎墮淚碑。  
州縣徒勞兩鬢霜。誰將嘉績傳循良。文章有子如歐九。一表瀧岡淚萬行。  
令德深閨不可窺。卻緣麟趾識關雎。獨憐天上歸來日。白髮無因見倚閨。  
相夫曾賦采蘋詩。教子猶懷斷織時。回首樟山封馬鬣。烏啼宰樹不勝悲。

送同年沈秋官海使閩還京二首

秋臺元自肅風霜。炎海俄驚五月涼。應是一夫冤未釋。使星中夜入南荒。  
素馨花發荔枝垂。樽酒江亭話別離。珍重故人天上去。爲言閩海正瘡痍。

建溪舟中口號五絕送同年鄭侍御昱還京

乘驄來按八諸侯。凜凜風霜六月秋。吏蠹民冤俱洗盡。更將謠頌達宸旒。  
昔人每羨嶽山搖。鎮靜今看一着高。自有澄清真事業。海波不動瘴煙消。  
武夷無復舊茶株。鑛盡銀場課未除。四牡諮詢多少事。皂囊應有萬言書。  
萬口嗷嗷待哺時。賑饑無策愧分司。飛章要劾牛羊牧。願放庸材理釣絲。  
行部無能展一籌。病軀仍抱素飡羞。日邊朋舊如相問。祗欠天曹一筆勾。

送洪憲長之官貴州并序。

恭聞憲長先生榮遷牧伯。遠蒞貴藩。某適爲二豎所困。弗能餞送。伏枕懷私。情不能已。聊賦小四詩絕。以道區區。詞雖不工而事皆紀其實云。

澄清未了旬宣去。玉節星輅出富沙。行李幾扛書籍外。不將一物度仙霞。  
三年閩海諮詢日。萬里口口保障時。獨有挽留諸父老。一聲聲是去思碑。  
忽聞巷語夜如雷。道是閩人借寇來。欲扣天關無路入。明朝相率拜都臺。  
左轄由來拱太微。卻教分省去羅施。遠人應識君王意。不道區區爲鬻絲。

別閩南僚友

三年憲府同懷抱。此日離亭惜解攜。回首建溪溪上路。春山隨處鷓鴣啼。

送賀位賀俸歸永新四首。并序。

歲暮山齋老梅始花。適賀生兄弟過予言別。因折一枝。口占小詩四絕爲贈。用致拳拳期待之意云。

梅花折得贈君歸。此是東風第一枝。看取瓊林新雨後。萬花場上奪魁時。  
梅花折得贈君歸。商鼎和羹會有時。四海蒼生饑渴甚。綠陰青子莫教遲。  
梅花折得贈君歸。老榦虬枝分外奇。絕似廣平心鐵石。生來不受雪霜欺。  
梅花折得贈君歸。愛此亭亭絕世姿。絕白真香誰得似。紫陽千載共襟期。

送鄭仁張銘歸瑞安并序。

東嘉鄭天爵。張永新。不遠千里。過我問易。數月而歸。予愧無所增益之也。口占小詩四絕以贈其行。

風度天香到酒卮。君行恰是桂花時。相期來歲秋風裏。折取蟾宮第一枝。  
東嘉自昔多龍首。禮樂三千對玉墀。白日青天能有幾。梅溪人物是吾師。  
鴈蕩名山天下奇。仰高懷古起遐思。止齋諸老談經濟。遂學雄文百世師。  
論心未久卽言歸。敬義工夫要夾持。潛室舊傳真統緒。歸來應自有餘師。

哭鄉同年二項叔姪 五首。并序。

項崇仁審之。予故人也。其甥鄭天爵。來從子游。知其夢奠。因其回而書以哭之。

昔同文戰淵闡秋。二項才名孰與儔。三十年來如一夢。萋萋宿草翳荒丘。  
蚤看雙鷄共橫秋。誰道相催記玉樓。今日送君多感慨。寄將老淚灑松楸。  
豪氣元龍百尺樓。牛刀纔試便長休。悠悠身後無窮恨。伯道淒涼土一抔。  
看花期向曲江遊。同輩相推讓一頭。不見臚傳春殿日。驚聞薤露使人愁。  
激浪陵雲志未酬。翻灰鱗殞使人愁。羊曇悲切平生事。不過西州亦淚流。

送潘匡善援歸括蒼兼柬舜絃先生 二首。

莆陽太守舊相知。節概文章重一時。蘭玉森森知有自。相逢兩月話心期。



故人爲別十年餘。不見雙魚尺素書。邂逅阿咸聊問訊。王官谷裏樂何如。

送唐御史韶巡按江西

二首。其先任蘭谿知縣

蘭陰山下舊棲鸞。攬轡今看度此山。白叟黃童垂淚送。手栽桃李半凋殘。繡衣持斧大江西。驄馬行行莫待遲。幾載載血腥章貢水。要君摩手洗瘡痍。

和周郎中木二詩韻

四首。木姑蘇人。時奉使江西。封王。

周萍實橋詩云。楚迷王道可興邦。徒倚禎符國祚長。千載江山類易姓。祇緣萍實誤昭王。

汝墳江漢古名邦。曾見周南化日長。麟趾騶虞渾忘卻。謾誇萍實瑞昭王。橋名萍實表南邦。謠語流傳歲月長。書社不封千載恨。空將霸業望君王。

周路中詩云。奉使岷藩入萬山。虎狼交跡茂林若。問知行李無私物。任我星輶自往還。

鑄節煌煌照楚山。天曹何事落人間。要知沿路官員好。須到萍鄉縣裏還。不持一物度關山。贏得清風滿世間。行向子陵臺下過。客星應識使星還。

哭外舅郭公五首

磊磊襟懷楚楚儀。客來能酒更能基。從今寂寞耆英會。不聽山陽笛也悲。貽謀未必新堂構。餘恨猶懷舊墓田。流水生涯今已矣。撫棺一慟訣終天。夢入南柯竟不還。華堂無復舊衣冠。空存手植庭前菊。留與諸郎灑淚看。

傷心一夜泰山頽。薤露聲中不盡哀。誼重恩深無可報。塚前銘許婿親裁。少日東床誇坦腹。年餘四十竟浮沈。自慚不是奇男子。空負平生擇婿心。

烟溪義渡四首。

立馬沙頭欲問津。憑君一葦策奇勳。一時義在烟溪上。千古名芳太史文。塵暗長途水拍堤。行逢義士在烟溪。慙慙爲濟蘆中客。莫愛官封楚執圭。濟巨平生每自期。歛南聊作小施爲。莫吟幽草高鷗句。未是春潮雨急時。楫擊中流應有志。舟橫野渡豈無能。獨憐亭長烏江上。不及淖沱一寸冰。

挽詩四首爲林繡衣貴實作

貴實。名誠。時巡兩浙鹽事。

其一寶澗西原誠之祖。

馬鬣封高寶澗西。夏官舊德樹新碑。白頭父老咸相過。共說賢孫似習之。

其二象峯東麓誠之父。

鴈塔歸來臥象峯。景鍾青簡兩成空。孤兒杖淚書遺訓。都在瀧岡一表中。

其三鳳山北隴誠之母。嘗更嫁。

鳳去山空幾夕陽。九原相見泣孤凰。當時不逐韓憑死。要待新雛羽翼長。

其四塗嶺南窩誠自爲生墓。

蹤脫蠅蝸世亦難。幾人打透死生關。一亭得正高千古。塗嶺今來望北山。

挽常山余知縣父母二首。

一經勤苦未收功。忍見舟移夜壑容。三釜竟違人子願。蕭蕭宰樹不禁風。九膽當年荷母慈。鳴琴今日見佳兒。獨憐墓下焚黃處。不及堂前捧檄時。

和吾景端韻二首。并序。

久疎馳問。方以爲愧。乃承不鄙。曲記賤生。賦之細葛。寵以佳章。厚意稠疊。其何以堪。食貧既久。無可爲謝。謹依嚴韻。聊賅二絕。用答來貺。

行年已度知非日。學易應思補過時。珍重故人相問訊。韋編三絕是心期。臯比擁處樂何如。春滿庭前草不除。他日相從問無極。文山風月未應虛。

陳處士南園詩卷四首。

平泉金谷競豪華。幾度花時得在家。爭似南園陳處士。曉看泉石暮烟霞。高臥邱園歲月賒。閑將抱甕作生涯。悠然得道忘機處。笑看紛紛兩角蝸。肉食無緣藿自安。畦蔬聊欲媚春盤。葵傷應有終年憾。芹獻難忘一寸丹。我愧貧無三徑資。好花真境邈難期。何時得借名園看。三復堯夫洛下詩。

雲津書院詩卷

三首。爲金華教諭劉啟作。

昔人黃卷青燈處。滄海桑田幾變更。獨有龍洲洲上水。東流還作誦絃聲。  
華構淪亡幾百年。雲津風月故依然。天留嘉定文章在。應把貽謀啓後賢。  
前宋衣冠迹已陳。芳洲勝槩屬何人。賢孫今紹箕裘業。雲路還從此問津。

挽金華鄭同知重父二首

歲蛇忽作康成夢。賦鵬空餘賈誼才。從此耒陽溪上菊。風霜時節為誰開。  
泮水已驚閑絳帳。王門無復見長裾。金華別駕終天戚。忍向窗前讀故書。

挽葉天官侍郎盛

二首。王倬女婿之祖。

華國文章老更奇。康時才業未全施。空餘歐范平生志。不見功名上鼎彝。  
金鑑朝端方委重。玉樓天上忽傳宣。迂生不識平津閣。因誦遺文亦泫然。

挽金氏夫人

二首。正室葉。

九苞鳴鳳正朝陽。丹穴生雛恨失凰。賴有當時胎教在。雲霄萬里看翱翔。  
吹棘恩深渾未報。蓼莪詩廢亦奚為。堂前捧檄人何在。腸斷秋香桂一枝。

挽耿氏夫人

二首。葉繼室。天官裕之女兒。

采蘋曾賦在公詩。九膽猶懷勸學時。回首堂封春草綠。野烏啼處不勝悲。  
頻向花前奉板輿。俄驚一夢入華胥。春暉寸草情何限。風木蕭蕭恨有餘。

次南部天官林亨大韻

庚申秋·林歸闔祭掃·便道來訪次·其韻·

高軒忽枉過山家。不憚雲昏道路賒。元宰爲憐衰病叟。昔年同看杏園花。

### 榮壽堂

劬勞父母年齡暮。孝理君王雨露深。臣子兩般俱可愧。爲君題卷獨關心。

夜坐得句寄示弟姪

癸亥冬在南雍作兆·嘉山·先府君墓也·

秋初一別又冬殘。欲寫家書意萬端。最是白頭千里外。時時夢到兆嘉山。

甲子新正齋宿有懷。訴孫詩以勉之。

自別吾孫每惘然。重陽不覺又新年。數書相勉無他語。黃卷青燈好著鞭。

### 羣鵲圖

噪樓曾報黎囚喜。集棘應占太史祥。修竹寒梅無外事。若爲羣語對荒涼。

挽秦行人祖父母二首。

道賁邱園世莫知。玉埋幽隴草離離。貝州名行垂千古。爲有賢孫似習之。錫胤少年因脫珥。弄孫暮景見含飴。大行追憶平生事。不讀陳情亦淚垂。

挽秦行人母二首。

葛覃樛木更蘋蘩。賸有徽音裕後昆。二少賢聲今籍甚。誰云芝醴不根源。

悼亡有夢成炊臼。捧檄無因見倚門。墓下焚黃悲慟處。五花鸞誥溼啼痕。

避喧卷

二首。為監丞載鋪題。

結廬高臥萬松間。為厭輪蹄日往還。用盡機關名利客。綺裘爭似綠蓑閑。采芝無夢到長安。世態榮枯了不關。況有鳳毛鳴盛世。底須園綺出商山。

南都別林王黃陳馬韓葉張諸尚書侍郎

區區績滿乞歸。尚未得請。過承盛饌相饒。何以克堪。席間口占小詩一絕。聊以為謝。

野性惟應臥草萊。建章鸚鵡詎堪陪。乞骸未得如疏傅。慚愧諸公祖帳開。

七言律詩 六十五首

登科

內苑作。閣老改龍門雁塔作春鱗秋鶚。

太平天子御金鑾。奎宿光芒午夜寒。漢代文章推董賈。唐家科第屬歐韓。龍門浪暖成頭角。雁塔風高快羽翰。雖是看花年尚少。莫將溫飽問儒冠。

瓊林賜宴

風雲千載趨重華。賜宴瓊林寵渥賒。丹桂廣寒非月窟。紫烟蓬島是天家。食分綾餅堆紅玉。酒出黃封瀉絳霞。見說金明池上事。有人聞喜不簪花。

早朝

未央鍾動曙光生。隱隱初聞柳外鶯。風靜御爐香篆細。日高斧座袞衣明。螭頭陛擁黃麾仗。豹尾班聯白玉珩。最喜君王勤庶政。蒼蠅聲裏問雞鳴。

禁中聞鶯

禁苑花深晝漏遲。鶯聲遙在萬年枝。不隨舞袖歌金谷。卻伴仙韶奏玉墀。長信夢回敲枕處。瑣闈吟罷倚闌時。東風空費如簧舌。不道明廷有鳳儀。

王孟端畫竹

此君一別已經年。今日披圖不厭看。風度只疑搖翠珮。月明應想下青鸞。肯隨羣卉爭春色。直伴孤松老歲寒。珍重鳳凰池上客。盡將清節付毫端。

圃東新井

鑿井深深傍玉堂。石根流沁一泓涼。冰壺夜浸秋蟾溼。雲液晴涵甘醴香。苔蘚未生侵玉甃。桐陰初長拂銀牀。寒泉可汲應須汲。莫使行人爲斷腸。

秋日感興

昨夜西風襲縕袍。壯懷落落興飄飄。全才人物思韓范。雜伯功名陋管蕭。閭闔萬言陳國論。沙場百戰滅天驕。前修未遠斯文在。九辯何須賦寂寥。

送彭閣老時歸省

出為蒼生去為親伊周地望閔曾身暫辭天上青槐位歸拜堂前白髮人五色錦衣供戲舞四時玉燭賴調均故園桑梓休留戀早促鳴騶上紫宸

送楊總兵

山西名將好男兒報國丹心一劍知  
口口口嚴號令口口寒膽避旌旗  
九重雨露朝承口口口雲夜出奇此去西口應坐困功成充國早口口

移菊

白玉堂前種紫薇菊花開落在東籬為憐秋後香偏好故向春前手自移  
苒苒旋添承露葉亭亭先長傲霜枝樂天只愛黃昏伴一種幽香恐未知

壽同年徐德宏父

家有四玉亭又有靈芝蕉花甘露之異故詩及之

四玉亭前歲月長葛巾藜杖足徜徉夏園老去芝應秀儀儼歸來桂正香  
花折瑞蕉供綺席酒和甘露薦瑤觴賓筵共祝南山壽開遍蟠桃鬢未霜

壽瞿中書父

曾因教子荷鸞封歸去錢塘鬢已蓬名利長安無舊夢耆英洛社有遺風  
消磨歲月琴樽裏收拾湖山杖屨中長對花前傾壽酒蟠桃看到幾番紅

壽雲南萬都司學士萬安之叔



奕世登壇笏滿牀。獨尋園綺共徜徉。耆英社裏清風在。安樂窩中白日長。南詔衣冠無此老。渡瀘勳業有諸郎。玉堂學士宗盟舊。壽語飛來雲錦章。

送謝守之無爲州

其父先守是州。其弟元吉爲翰林庶吉士。

東風躍馬錦溪傍。重佩而翁太守章。騎竹兒迎新皂蓋。愛棠人說舊黃堂。野田雨秀雙歧麥。燕寢春凝一篆香。難弟正紬金匱史。要看橋梓共循良。

送宋爾章乃弟歸江西

君從璧水泛歸舟。兄在蓬萊第幾洲。春草池塘靈運夢。夜牀風雨子瞻愁。鴈行暫隔千山露。鵬翼還看萬里秋。別後二難相會處。看花騎馬曲江頭。

送國子監侯先生祭掃

丹陛陳情許晝遊。桂花香裏泛歸舟。十年宦況橋門月。千里鄉心浙水秋。天上恩頒新雨露。塚前光動舊松楸。平生風木無窮恨。憑仗龍章賁九幽。

送同年翁進士晏歸省

萬里青霄路始通。白雲情思忽匆匆。一樽別酒歌黃鵠。十幅歸帆逐去鴻。秋雨江村榕葉暗。夕陽籬落槿花紅。慈恩未報天恩重。一念難忘是孝忠。

挽虞黃門瑤妻